

Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat

Kapitali 1

Qitiusumik Suliffeqarfinnik Nalunaarsuiffimmi nalunaarsuisarneq

§ 1. Kalaallit Nunaanni inatsisit naapertorlugit ingerlatsiviit nioqqutissiorfillu Inatsisartut inatsisaat una malillugu maleruagassallu inatsit taanna malillugu aalajangersarneqartut malillugit Qitiusumik Suliffeqarfinnik Nalunaarsuisarfimmi (CVR-mi nalunaarsuiffik) nalunaarsorneqassapput.

Imm. 2. Allanik suliaqartut § 1-imni taaneqanngitsut nalunaarsorneqarnissaat pillugu Naalakkersuisut malittarisassanik erseqqinnerusunik aalajangersaasinnappaat.

Imm. 3. Naalakkersuisut malittarisassanik erseqqinnerusunik aalajangersaaffigisinnavaat:

- 1) Kalaallit Nunaanni oqartussat CVR-mi nalunaarsuiffimiittunik paasissutissanik nutarterisinnaanerat.
- 2) Kinaassutsimut uppernarsaatit normuinik pisortat ingerlatsiviini atuisarnissaq.
- 3) Ussassaarutinut illersugaasinnaaneq.

Kapitali 2

Nassuaatit

§ 2. Inatsisit naapertorlugit ingerlatsivittut inatsimmi matumani paasineqassapput:

- 1) Inuk nammineq sulisitsisuusoq imaluunniit namminersortutut inuussutissarsiummik ingerlataqartoq.
- 2) Inuk inatsisit naapertorlugit ingerlatsiviusoq imaluunniit inuk nunani allani ingerlatsiviup immikkoortortaa.
- 3) Namminersorlutik Oqartussat.
- 4) Kommune.
- 5) Kommunit suleqatigiiffiat.

§ 3. Nioqqutissiornermik ingerlatsivittut ataatsimoortutut inatsimmi matumani paasineqassapput:

- 1) Ingerlataq pingarneq, inatsisit naapertorlugit ingerlatsivimmit ingerlanneqartoq, ingerlatamik pingarnermik ataasiinnarmik ingerlatsisuusoq, ingerlatallu tamarmik sumiiffimmi najukkamit ataatsimit inatsit naapertorlugit ingerlatsivimmit ingerlanneqartut.
- 2) Ingerlataq pingarneq ataaseq, inatsisit naapertorlugit ingerlatsivik pingarnertut arlalinnik ingerlataqarpal, taakkualu sumiiffimmi najukkamit ataatsimit ingerlanneqarpata.
- 3) Ingerlataq inatsisit naapertorlugit ingerlatsivik sumiiffinni najukanit arlaqartunit ingerlatsisoqarpal.

Kapitali 3

Atuisunut akiliisitsisarneq

§ 4. CVR-mi nalunaarsuiffimmit nalunaarsukkanik tunisaqarnermi aamma nalunaarsuisarnernut akiliuteqarnissamut tunngatillugu malittarisassanik ersarinnerusunik Naalakkersuisut aalajangersaasinnaapput.

Kapitali 4

Pineqaatissiissutaasinnaasut

§ 5. Pineqaatissiilluni akiliisitsissutissamik akiligassinneqarsinnaavoq § 1, imm. 1 aamma 2 naapertorlugit nalunaarsuinissamik naammassinninngitsoq, imaluunniit piaaraluni mianersuaalliorujussuarluniluunniit equnngitsunik paasissutissiisoq.

Imm. 2. Aalajangersakkanik unioqqutitsisoqartillugu Kalaallit Nunaanni pinerluttulerinerimi inatsit malillugu akiliisitsinikkut pineqaatissiisoqarsinnaanera Inatsisartut inatsisaat una naapertorlugu aalajangersakkani aalajangersarneqartuni aalajangerneqarsinnaavoq.

Imm. 3. Inatsisit naapertorlugit inuk pineqaatissiilluni akiliisitsissutissamik akiligassinneqarsinnaavoq Inatsisartut inatsisaannik malittarisassanillu Inatsisartut inatsisaat naapertorlugu aalajangersarneqarsimasunik unioqqutitsisimappat, takukkit Kalaallit Nunaanni pinerluttulerinermut inatsimmi malittarisassat kapitali 5-imiittut.

Imm. 4. Akiliisitsissutit Inatsisartut inatsisaat manna imaluunniit aalajangersakkat Inatsisartut inatsisaat naapertorlugu aalajangersarneqartut malillugit akilerneqartut Nunatta Karsianut isertinneqartassapput.

§ 6. Inatsisartut inatsisaat ulloq 1. januar 2018 atuutilerpoq.

Imm. 2. Tamatumunnga peqatigittillugu Inuussutissarsiummik Ingerlataqartunik Nalunaarsuiffifik pillugu Inatsisartut inatsisaat nr. 10, 29. oktober 1999-imeersoq atorunnaarsinneqarpoq.

Imm. 3. Inatsisartut inatsisaata atuutilernerani Inuussutissarsiummik Ingerlataqartunik Nalunaarsuiffimmi nalunaarsorneqarnermi normut atuuttut CVR-imi nalunaarsuiffimmi kinaanermut upfernarsaatit normuinik taarserneqassapput.

Namminersorlutik Oqartussat, ulloq 28. november 2016

Kim Kielsen

Namminersorlutik Oqartussat

Imaneq 4

3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut